

Pimpin pelajar masuki pasaran kerjaya

PERKESO lancar Program *Career Exploration* di peringkat sekolah

Oleh IZWAN ROZLIN
KUALA LANGAT

Bagi memastikan murid-murid sekolah menengah cakna dengan situasi pasaran kerja semasa, Pertubuhan Keselamatan Sosial (PERKESO) melancarkan Program *Career Exploration* di peringkat sekolah.

Menteri Sumber Manusia, V. Sivakumar berkata, langkah ini diambil bagi memastikan pelajar mempunyai hala tuju untuk menyambung pelajaran di peringkat universiti dengan mengambil jurusan yang mempunyai pasaran kerja pada masa akan datang.

Menurutnya berdasarkan statistik, MYFutureJobs merekodkan seramai 15,460 graduan atau 42 peratus mengalami isu ketidakpadanan kerjaya kerana mereka berkecimpung dalam industri separa mahir dan rendah serta



FOTO MOHD RAFIQ REDZUAN HAMZAH

Sivakumar dan tetamu kehormat, guru dan pelajar yang hadir pada Pelancaran Program *Career Exploration* anjuran PERKESO di Sekolah Menengah Kebangsaan Batu Laut.

bergaji RM2,000 ke bawah, setakat 14 Julai tahun ini.

“Dengan adanya program ini, graduan yang berdepan isu ketidakpadanan kerjaya diyakini mampu dikurangkan dari semasa ke semasa sekali gus menyaksikan pelajar-pelajar berada di landasan yang tepat dalam meneruskan kerjaya masing-masing,” katanya.

Beliau berkata demikian pada sidang akhbar Pelancaran Program *Career Exploration* di Sekolah Menengah Kebangsaan Batu Laut, di sini pada Isnin.

Turut hadir, Ketua Pegawai Eksekutif Kumpulan PERKESO, Datuk Seri Dr Mohammed Azman Aziz Mohammed, Setiausaha Bahagian Psikologi dan Kaunseling, Salmiah Monshie dan Pengerusi Lembaga PERKESO, Datuk Seri Subahan Kamal.

Jelas Sivakumar, pelaksanaan program hasil kerjasama PERKESO dengan Pintar Foundation setakat ini merangkumi 11 buah sekolah di Selangor, Kuala Lumpur, Putrajaya dan Pahang dengan penglibatan lebih 1,000 murid.

“Kami percaya usaha berterusan boleh merealisasikan sasaran penurunan kadar pengangguran seperti mana strategi kedua yang diwujudkan dalam Pelan Strategik Kementerian Sumber Manusia 2020-2025,” katanya.

Sivakumar berkata, Program *Career Exploration* ini dapat membantu Guru Bimbingan dan Kaunseling sekolah dalam membawa peranan sebagai mentor untuk merealisasikan hasrat kerajaan Madani dalam membangunkan modal insan minda kelas pertama.

“Program ini menggunakan pendekatan ujian psikometrik yang memfokuskan pembangunan insaniah.

“Ia bertujuan mewujudkan kesedaran potensi diri di kalangan pelajar sekolah mengaplikasikan kemahiran untuk dijadikan panduan dalam pemilihan institusi pendidikan dan kerjaya pada masa hadapan,” ujarnya.

Tambahnya lagi, sebagai usaha untuk meningkatkan peluang dan penempatan pekerjaan, Kementerian Sumber Manusia menerusi PERKESO juga telah melaksanakan Insentif Kerjaya Madani 2023 merangkumi Program Bina Kerjaya, Program Daya Kerjaya dan Program Daya Kerjaya (TVET).

TARIKH: 11/8/23
SURAT KHABAR: Sinar Harian
MUKA SURAT: 9

Sinar Harian
11/8/23 ms9